

PAS kemuka 'bukti' ia tidak bisu isu 1MDB
Free Malaysia Today
Julai 26, 2016

Bagaimanapun separuh daripada 18 kenyataan media pemimpin PAS sejak Disember lalu dikeluarkan oleh timbalan presidennya.

PETALING JAYA: Lidah rasmi PAS Harakahdaily hari ini menyenaraikan kenyataan beberapa pemimpin kanan PAS bagi menepis dakwaan parti itu membisu dalam isu skandal 1MDB.

“Dakwaan kononnya PAS membisu berhubung skandal 1MDB adalah propaganda, cetusan sensasi dan publisiti murahan pihak yang terdesak untuk mencalar kewibawaan PAS.

“Malah, difitnah pula pimpinan PAS cuba melindungi mereka yang terlibat termasuk Perdana Menteri, Datuk Seri Najib Razak dan menerima imbuhan ‘dedak’ atas sikap itu,” kata komen yang disusuli 18 kenyataan media sejak Disember lalu.

Bagaimanapun, tinjauan mendapati sembilan atau 50% daripada 18 kenyataan yang disenaraikan adalah daripada Timbalan Presiden, Datuk Tuan Ibrahim Tuan Man, pemimpin PAS yang dilihat lantang mengkritik secara langsung syarikat bermasalah itu.

Dua kenyataan dikeluarkan Presiden PAS, Datuk Seri Abdul Hadi Awang, satu daripadanya merupakan gesaan supaya kuasa asing tidak campur tangan siasatan 1MDB, manakala satu lagi merupakan kenyataan bersama Tuan Ibrahim menuntut penubuhan suruhanjaya diraja bagi menyiasat syarikat milik Kementerian Kewangan itu.

Satu-satunya kenyataan dikeluarkan Mursyidul Am, Datuk Dr Haron Din, mengkritik laporan The Wall Street Journal (WSJ) mengenai aliran wang berbilion ringgit ke dalam akaun peribadi Najib sebagai “tidak logik”.

Kenyataan Haron itu dibuat selepas laporan WSJ pada Jun 2015 yang mendedahkan Najib menerima RM2.6 bilion. Najib mengakui menerima wang tetapi menafikan ia ada kaitan dengan 1MDB.

Skandal 1MDB kembali hangat selepas Jabatan Kehakiman Amerika Syarikat memfailkan saman mahu menyita aset berkaitan 1MDB bernilai AS\$1 bilion, selepas penyiasat negara itu mendapati salah laku dan kecurian wang daripada syarikat itu.

Dokuman AS itu turut menamakan anak angkat Najib, Riza Aziz, dan antara lain mendakwa sejumlah AS\$11 juta (RM44.8 juta) wang 1MDB dibayar kepada sebuah kasino di Las Vegas bagi melangsaikan hutang judi ahli perniagaan Low Taek Jho.

Copyright (C) 2009-2016 MToday News Sdn. Bhd. All Rights Reserved.

Source: <http://www.freemalaysiatoday.com/category/bahasa/2016/07/26/pas-kemuka-bukti-ia-tidak-bisu-isu-1mdb/>